

[Leipzig], 30. Dezember 1553

Von Joachim Camerarius d. Ä.

Druck: Camerarius, Epistolae S. 454f.

S. D. Climacter<sup>1</sup> hic noster sic satis nos exercet. Inter cuius aduersationes non minimè molesta haec fuit, quòd non redditae mihi fuere litterae tuae Norimbergae. Cùm enim ibi in deliberationibus varijs haererem, momento litterarum tuarum facili impelli potuissem, vt istuc me conferrem. Nunc illas post discessum meum allatas ad familiam meam, hīc nuper primūm accepi. Adduxissem autem mecum nullum comitatum nisi Musarum nostrarum, non harum quidem nitentum et laetarum, sed tristium et horridularum in his Reip[ublicae] calamitatibus et nostris curis. Ithic autem cùm in eorum virtute et excellente humanitate, à quibus hospitium benignissimè offertur, tum tua et Cypriani suauitate, non dubito quin illae recreatae aliquid elegantiae recuperassent. Sed nunc reuersus ad Academiam, quid me futurum sit et expecto et permitto Deo. Ex hortis nunc neque vt Vlysses contemplando voluptatem capere potuissem, neque rerum ignotarum scientiam, quod mihi est multo potius, tanquam fructus percipere. Vtinam ea sint tempora futurae aestatis, quae commoditatem nobis istam concedant: neque eam vel alia infortunia eripiant, vel auferat illa grandis et πολυάνθρωπος ξενοδοχία, cuius meministi. Narrabatur etiam nescio quid negotij facessere vestris illum, quem tu tam terribili nomine soles appellare. fui admiratus et planè consternatus. Omnibus autem iamdudum meis rationibus ita confusis, vt de Repub[lica] constituere animo nihil possim, quid nunc censes euenire talia audienti? Sed de his aliàs. Mitto tibi versus, quos meam consuetudinem seruans nuper composui, vt his ferijs proponerentur. Te quām felicissimè valere cupio. Meum Petrum à te diligi ex ipsius litteris animaduerto, quo nomine tibi gratias ago. Vale. 3. Cal[endas] Ian[uarij]. 1554.

<sup>1</sup>Climacter] Clemacter Druck.